

**Illoqarfinni anginerne sisamani nalinginnaasumik attartortittakkanik inissialiortiternissamik ukiuni 2010-mit 2020-imut pisariaqartinneqartut pillugit Naalakkersuisut nassuiaammik saqqummiussaqaqarnissaannik Inatsisartut aalajangiussinissaannik siunnersuut. Nassuiaat upernaakkut 2010-mi saqqummiunneqassaaq.**

(Inatsisartunut ilaasortaq Olga P. Berthelsen, Inuit Ataqtigiit)

**Akissuteqaat**

(Ineqarnermut, Attaveqarnermut Angallannernullu Naalakkersuisoq)

**Aappassaanneerpeqarnera**

Aallarniutigalugu Naalakkersuisuniit Attaveqatigiinnermut Ineqarnernullu Ataatsimiititaliap isumaliutissiissut saqqummiussaa isumaliutiginneqissaarsimanageralu pillugu qutsavigaarput.

Naalakkersuisuniit aallarniutigalugu erseqqissaatigissavarput, siunnersuutip siullermeerneqarnerani Inatsisartuni amerlanerussuteqartut siunnersuummut tapersersuinerat aamma Ataatsimiititaliamit maluginiarneqarsimammat.

Tamatuma saniatigut Naalakkersuisunit erseqqissaatigissavarput, nalunaarusiortoqaqarnissaa imaluunniit nalunaarusiap taassuma Inatsisartut 2010-mi upernaakkut ataatsimiinneranni saqqummiunneqarnissaa isumaqatigiinngissutaanngitsoq Ataatsimiititaliamit maluginiarneqarsimammat. Aammalu Ataatsimiititaliap eqqortumik maluginiarsimavaa, siunnersuummi nunap aggorneranut killilersuineq, tassalu nalunaarusiami illoqarfiit annerit sisamat kisimik ilaatinneqarnissaannut tunngasoq tamakkiisumik isumaqatigiissutigineqanngitsoq.

Ataatsimiititaliami amerlanerussuteqartut pisariaqartitsinerup illoqarfinni annerni sisamani annertunerpaanera tunngavigalugu siunnersuummut tapersersuinerannut Naalakkersuisut tamakkiisumik isumaqataapput. Taakkunanissaaq inuussutissarsiutinik ineriartortitsinermi periarfissat, taamaalillunilu sulisoqarnikkut periarfissat annertunerpaapput. Misissuinerup nunap iluani annertusineqarsinnaanera pissusissamisuginnassagaluartoq, kisiannili misissuinerup taassuma immikkut ingerlanneqartariaqarnera pillugu Ataatsimiititaliami amerlanerussuteqartut isumaannut Naalakkersuisut isumaqataapput.

Tamatumunnga atatillugu oqaatigineqarsinnaavoq, illoqarfiit allat arlallit, misissuinermut tassunga ilaatinneqartussaannngitsut inissianik sinneqartoorfiummata, inissianillu attartortitsiniarnermik ajornartorsiorfiullutik. Ajornartorsiutip taassuma misissuiffigineqarnissaa paasisaqarfigineqarnissaalu illoqarfinni sisamani pineqartuni misissuinermut pissusissamisoortumik nangissutaasussaassaaq.

Taamatut oqaaseqarluta Naalakkersuisuniit aalajangiiffigisassatut siunnersuutip taperserneqarnissaa inassutigisinnaavarput.